

WACHUNGAJI WAZAWA NCHINI TANZANIA

Re-arranged and translated by Pastor Stephen Letta

Joseph Shem Onyango, (1936–2010)

Joseph Shem Onyango alikuwa mwanzilishi wa kanisa, mchungaji, mhubiri, mwinjilisti, na mshauri wa ndoa.

Maisha ya awali

Joseph Shem Onyango, mtoto pekee wa mama yake, Paulina, alizaliwa Juni 26, 1936, huko Utegi, mkoani Mara Kaskazini Magharibi mwa Tanzania. Baba yake, Yakobo Shemu, alikuwa na ng'ombe wengi na alikuwa na wake 15 na watoto 68. Katika hali ya kusikitisha hata hivyo, mama yake Onyango alifariki wakati Joseph Onyango akiwa na umri wa miaka mitano tu huko Utegi, ambako alitumia muda mwingi wa utoto wake.

Onyango, kama lilivyokuwa akiitwa wakati wa utoto wake, alisoma hadi darasa la nne katika shule ya msingi ya Kikatoliki huko Kowak huko Mara. Kisha, alisoma shule ya kati katika Shule ya Misheni ya Waadventista ya Kibumaye kuanzia 1949 hadi 1953, kisha akahudhuria Shule ya Sekondari ya Waadventista ya Bugema nchini Uganda kuanzia 1953 hadi 1956. Alitambulika kama mtu mwenye elimu nzuri kwa wakati wake na katika eneo lake.

Uongofu na Ndoa

Onyango alikua mfanyabiashara ambaye alijishughulisha na usafirishaji wa samaki huko Musoma, makao makuu ya mkoa wa Mara. Huko alikutana na kumpenda Rhoda Adhiambo ambaye baba yake alikuwa wakili. Onyango alimchumbia Rhoda, ambaye alikubali kuolewa naye kwa sharti kwamba atakubali kubatizwa na kuwa Muadventista wa Sabato. Rhoda alimtambulisha Onyango kwa mchungaji wa kanisa lake huko Musoma, Mchungaji Mispereth Rutolyo, ambaye alimtia moyo kijana huyo kujiunga na darasa la ubatizo. Onyango alibatizwa na kisha kumuoia Rhoda mnamo Juni 1956 huko Musoma.

Elimu

Baada ya kushuhudia uwezo na kujitoa kwa mumewe, Rhoda alimtia moyo Onyango kusomea uchungaji. Ni Mchungaji Rutolyo tena aliyempendekeza rasmi Onyango kwa Katibu wa chama cha wachungaji wa Fildi ya Nyanza Mashariki. Kwa hiyo, Onyango alifadhiliwa kuhudhuria Chuo cha Misheni cha Bugema kuanzia 1962 hadi 1964, ambako alipata diploma yake ya uchungaji.

Onyango na Rhoda walibarikiwa kupata watoto watano: Grace, Maxwell, Tabu, Paul, na Baraka. Mwana wao, Maxwell, ambaye alikuwa mweka hazina msaidizi wa Union ya Tanzania, alifariki katika ajali ya gari mwaka wa 1993.

Uchungaji

Mchungaji Joseph Shem Onyango aliitwa kuwa mchungaji wa mstari wa mbele huko Kirumba katika jiji la Mwanza mwaka 1965 ambapo alikuwa mchungaji wa kwanza

WACHUNGAJI WAZAWA NCHINI TANZANIA

Re-arranged and translated by Pastor Stephen Letta

Mwafrika wa kanisa hilo la manisipaa. Baada ya kutumikia kwa miaka mitano, aliombwa ajiunge na kazi ya kujitolea huko Maswa katika mkoa wa Shinyanga mwaka wa 1970.

Mchungaji Robinson, mwenyekiti wa misheni ya Union ya Tanzania, alifurahishwa na huduma ya Onyango, na miezi sita tu baada ya kuanza kufanya kazi huko Maswa mwaka wa 1970, Mzee Robinson alianzisha wito wa kumhamisha Onyango katika jiji la Dar-es-Salaam. Huko alichunga Kanisa la Magomeni SDA, kanisa la kwanza na la pekee mjini. Akiwa huko, Mchungaji Onyango alitenga Kanisa la SDA la Temeke, Kanisa la SDA la Kibaha, na tawi la Kanisa la Chuo Kikuu.

Mnamo 1975 Mchungaji Onyango aliamia Mbeya kufungua kazi huko. Mwaka mmoja baadaye aliamia Lindi ambako alikaa mwaka mmoja na nusu na kutenga kanisa huko.

Mwaka 1976 Mchungaji Onyango alitwa kuwa mmoja kati ya wachungaji-wainjilisti watano wa Union ya Tanzania ambao walichaguliwa kutoka fildi tano za union hiyo ili kuunda timu ya mstari wa mbele ya wainjilisti ambao kwa muda wa miaka sita walitoka jiji moja kubwa hadi jingine katika Tanzania nzima wakiendesha mfululizo wa mahubiri makubwa ya uinjilisti yasiyopungua majuma matano kila moja.

Wakati wa misukumo ya uinjilisti ambayo Mchungaji Onyango alikuwa sehemu yake, mamia ya roho zilivutwa kwa Kristo. Baadaye aliamishiwa Morogoro, makao makuu ya Tanzania General Fildi ya wakati huo. Hapa alikua mkurugenzi wa idara ya Shule ya Sabato na huduma za kanisa, ambazo zilijumuisha huduma za familia na huduma zingine. Alifanya hivi kuanzia 1977 hadi 2000.

Mchungaji Onyango alithibitisha kuwa mshauri mzuri wa ndoa, na aliongoza ndoa zaidi ya 700, kulingana na hesabu yake mwenyewe, wakati wa kustaafu kwake. Hakusahau ndoa ya kwanza ambayo alifunga Aprili 6, 1969. Kijana huyo alitwa David, na baadaye akawa daktari binafsi wa rais wa Tanzania na hatimaye waziri wa serikali. Mchungaji Onyango alitayarisha zaidi ya DVD kumi za "Sera za Ndoa" ambazo zilipata umaarufu mkubwa nchini katika miaka ya 1990, na aliandika vitabu viwili kuhusu maisha ya ndoa ambavyo bado vinatolewa na viwanda vya uchapaji vilivyo karibu.

Miaka miwili kabla ya kustaafu kwake, Mchungaji Onyango alikubali mwito wa kuwa mchungaji wa mstari wa mbele wa kanisa hilo katika jiji la Morogoro, ambalo lilikuwa sehemu yake ya mwisho ya huduma.

Maisha ya Baadaye

Mchungaji Joseph Shem Onyango alistaafu rasmi Februari 2003, lakini aliendelea kuwa na bidii katika kumtumikia Bwana wake nafasi zilipojitokeza. Baada ya kufanya kazi kwa bidii sana kusuluhisha mzozo wa kanisa katika kanisa lililo umbali wa zaidi ya kilomita 100 kutoka nyumbani kwake Morogoro, alikuwa akirejea kwenye kanisa

WACHUNGAJI WAZAWA NCHINI TANZANIA

Re-arranged and translated by Pastor Stephen Letta

hilo kwa programu ya juma zima ya Maisha ya Familia ya Shukrani alipogongwa na mwendesha pikipiki mnamo Septemba 17, 2010 na kufariki papo hapo. Mazishi yalihudhuriwa na watu wengi kutoka mjini na kwingineko. Hudhurio hilo kubwa lilikuwa ushuhuda wenye nguvu wa namna alivyoigusa jamii, na halitasahaulika kwa urahisi katika sehemu hiyo ya dunia.

Mchungaji Joseph Shem Onyango atakumbukwa kwa mahubiri yake ya kuvutia na mawasilisho yake ya ndoa aliyoyaita *sera za ndoa*.